

սակայն այնպես, որ հարկ եղած ժամանակ շաքանի ծայրերը միացնելով՝ մուտքը կարելի է փակել ներսը մտնել փորձող անասունի կամ շան առջև: Վրանի կմախքը ծածկվում է թաղիքով, որն ավելի է պահպանում անձրևաջրից, կամ մի երկու տակ փայտասով կամ հին գորգով, գլխավորապես անձրևից պաշտպանելու համար: Հեռատես և փորձված սարվորները քամուց պաշտպանվելու համար ամբողջ կազմվածքը գրսից կապում են երկար շվանով կամ պարանով, սակայն դա երբեմն չի պաշտպանում լեռնային մրրիկից: Երբեմն պատահում է, որ քամին գջլում՝ պոկում է վրանի ծածկը կամ նույնիսկ շրջում է ամբողջ կառուցվածքը: Այդպիսի վտանգից իրեն պահպանելու համար ծածկող թաղիքի կամ կարպետի ծայրերից կախում են քարեր:

Թե ո՞րչափ ալաշուխի այս ձևը զուտ տեղական սովորություն է և յուրացված է տեղում Ասիայի խորքերից ներխուժած թաթարա-մոնղոլական էթնիկ տարրի կողմից և թե՞ արդյոք, ընդհանրապես՝ այս նորամուտ էթնիկ տարրն է, որ իր հետ է բերել իր վրանակազմության ձևը և տեղացիներին ընդունելի դարձրել— սա դժվար լուծելի խնդիր է, քանի որ տեղեկություն չունենք վրանակազմության այն ձևերի մասին, որ մշակված են եղել հնուց տեղում, ինչպես որ նաև չունենք անվիճելի ծանոթություն թաթար-մոնղոլների Անդրկովկաս բերած հայրենի վրանի ավանդական ձևերի մասին: Միջինասիական և մոնղոլական ժամանակակից վրանների ձևերի մեջ չենք հանդիպում Զանգեզուրի երկարավուն տիպին²²: Այնտեղ բացառապես իշխում է կլոր վրանը, որի աղեղները խաշաձևվում են կենտրոնում, առանց տակից այդտեղ նեցուկսյուն ունենալու, հիշեցնող ավելի կուլա տիպին: Այս տիպը մի ձևափոխություն է վրանի այն տիպի, որտեղ ձողերը տնկված են լինում շրջանակի, իսկ ձողերը առանց կորացնելու, ծայրերով իրար միանալով՝ սրածայր գագաթ են կազմում: Վերը գրված հարցին պատասխանելը զուցե որոշ չափով դյուրանա, եթե աչքի առջև ունենանք այն հանգամանքը, որ Զանգեզուրի քարե շենքերի մեջ տեղական ճարտարապետական ճաշակը սիրում է երկար թաղակապ ձևը, ինչպես դա երևան է գալիս, օրինակ՝ Բրատակնէրի առջև ավելացվող դալան պատշգամբների մեջ, Մելիք Փարմազի և Օրբելյան Հովհաննես-բեկի սրահ-ընդունարանների մեջ, վերջապես բոլոր գյուղերի եկեղեցական շենքերի մեջ— լինեն նրանք մեկ թե երեքավանի բազիլիկաներ միշտ ունենում են երկարացրած թաղակապ առաստաղ: Այստեղ կարելի է մտաբերել և այն բանը, որ երկարավուն վրանը շատ է հիշեցնում Զանգեզուրի համար այնքան հարազատ քարանձավները, որոնց առաստաղը երբեք չի լինում հորիզոնական կամ կիսադնդակաձև և ձևավորված է լինում մեծ մասամբ որպես երկարացրած թաղ:

Օջախը սովորաբար շինվում է վրանի մեջ հենց մուտքի աջ կամ ձախ կողմում: Դա մի փոքր փոսիկ է և կողքերին երկու քար՝ վրան կերակրի ամանը դնելու համար: Կրակը վառելիս՝ վրանի այդ կողմից թաղիքը բարձրացնում են և շաքանը ետ են քաշում՝ ծխին ազատ ելք տալու համար: Մի այլ օջախ էլ պատրաստվում է վրանից դուրս՝ պարզ ու հանգիստ եղանակին կրակն այնտեղ բորբոքելու համար: Հաց թխելու համար փորվում է վրանից դուրս ժամանակավոր քորէն, շատ անգամ քարերով պատած և կողերը կավով մի կերպ սվազած հոր: Թորէնի վրա սարքվում է նախնական ձևով ծածկ, իսկ քամուց պաշտպանելու համար կողքերին ճեմից կամ քարից շարված կիսա-

²² St'u Харузин Н., Кибитки среднеазиатских и монгольских народов.